

## ORDNING FOR GUDSTENESTER I KONFIRMASJONSTIDA

### Gudsteneste med presentasjon av konfirmantar som høyrer til i kyrkjelyden

Når konfirmasjonstida tek til, blir konfirmantane i kyrkjelyden presenterte i ei gudsteneste. Ein legg presentasjonen av konfirmantane anten til del I Samling eller til ledd 18 Forbøn i gudstenesta. Presentasjonen kan knytast til lystenning eller andre enkle symbolhandlingar.

Forbøn kan ein henta frå ferdigskrivne forbøner i Ordning for hovudgudsteneste alternativ 4 eller i lokal utforming.

Følgjande bøn kan ein nytta som *Bøn for konfirmantane*, under del 18 Forbøn.

*L/ML* La oss venda oss til Gud i bøn.

Kjære Gud, du kjenner og elsker oss alle.  
Takk for livet du har gjeve oss.  
Vi takkar deg for konfirmantane.  
Vi bed for kvar og éin av dei,  
for familien, venene og fadrane.  
Velsign konfirmasjonstida  
og lat oss alle veksa i tru, håp og kjærleik.  
Gud, vi bed:  
*M Kyrkjelydssvar*

*L/ML* Gode Gud, du har skapt oss og jorda vi bur på.  
Lær oss å ta vare på skaparverket ditt,  
skapa fred der hatet rår, gje svoltne mat  
og verna menneske på flukt.  
Vi bed for landet vårt og for staden der vi bur (eller byen/bygda).  
Styrk fellesskapa våre og gje alle ein stad å høyra til.  
Gud, vi bed:  
*M Kyrkjelydssvar*

*L/ML* Takk for kyrkja,  
der du møter oss med dine gåver  
og gjev oss framtid og håp.  
Lat kyrkja vera staden der trua og livet finn styrke og kraft.  
Gud, vi bed:  
*M Kyrkjelydssvar*

*L/ML* Evt.: Vi bed for... (aktuelle bønemne i lokalt- nasjonalt eller globalt perspektiv)

*L/ML* Gud vi bed  
*M Kyrkjelydssvar*

Her følgjer Fadervår. Om ein feirar nattverd, bed ein Fadervår under del III Nattverd i liturgien. Gudstenesta held fram i tråd med den lokale grunnordninga.

# Konfirmasjonsgudsteneste

Konfirmasjonstida blir avslutta med konfirmasjonsgudstenesta. Ein kan feira nattverd i gudstenesta.

Konfirmasjon blir om hovudregel feira i kyrkjelydens hovudgudsteneste på søn- eller helgedag. Ein kan også leggja konfirmasjonsgudsteneste til ein laurdag.

Gudstenesta følgjer den lokale grunnordninga for hovudgudsteneste.

Ved prosesjon kan ein ringja med alle klokkene.

Presten kan bera messehaket. Den liturgiske fargen er kvit.

Der ein har påskelys er dette tent.

## I. Samling

### 1 | Førebuing

Klokkeringing

Her eller etter ledd 3 Helsing kan det vera:

*Kort informasjon om gudstenesta i dag ved medliturg eller liturg.*

Informasjonen blir avslutta med:

ML/L: Lat oss vera stille for Gud.

### Kort stille stund

### Tre klokkeslag

*Eit stjernetekn (\*) er sett til ledd der kyrkjelyden som hovudregel står.*

### \*2 | Inngangssalme

Kyrkjelyden står under prosesjon, Inngangssalme og Helsing.

### \*3 | Helsing

Før dei to første alternativa til inngangsorda kan liturgen seia: Kjære kyrkjelyd:

*L* Nåde vere med dykk og fred  
frå Gud, vår Far, og Herren Jesus Kristus.

Eller

Vår Herre Jesu Kristi nåde, Guds kjærleik  
og Den heilage andens samfunn vere med dykk alle.

Eller

I namnet åt Faderen og Sonen og Den heilage ande.

Eller

I namnet åt Faderen og Sonen og Den heilage ande: Vår skapar, frigjerar og livgjevar.

Dersom kort informasjon om gudstenesta ikkje er gjeven under ledd 1, kan ein gje den her.

#### 4 | Samlingsbøn

Sjå samlingsbøner i Ordning for hovudgudsteneste eller samlingsbøner med eige ledd for konfirmasjon (pkt 9, Samlingsbøner med kyrkjeårsvariable ledd). Samlingsbøn kan ein også forma lokalt (pkt 10, Modell for lokalt utforma samlingsbøn). Ein kan også nytta følgjande bøn (frå 2002-liturgien):

*L* Lat oss be.

Herre, vår Gud, vi takkar deg for konfirmasjonstida.

Takk for at du elsker oss og kjenner alt i våre liv.

Gjer oss opne for det du vil gje oss.

Velsign denne dagen. Amen.

#### 5 | Syndsvedkjenning

Følgjer her, eller før ledd 15 Påminning om dåpen.

#### 6 | Bønrop Kyrie

#### 7 | Lovsong Gloria

#### 8 | Dagens bøn

Dagens bøn kan utelatast.

For den aktuelle søndagen kan ein i staden be følgjande bøn:

*L* Evige Gud, vi takkar og lovprisar deg.

Det er i deg vi lever, rører oss og er til.

Ver vår styrke og hjelp gjennom livet,

ved Son din, Jesus Kristus, vår Herre,

som med deg og Den heilage ande lever og råder,

éin sann Gud frå æve til æve.

## II. Ordet

Det blir lese éin eller to lesetekstar i tillegg til preiketeksten.

Ein vel i hovudsak tekstar frå eit gjeve tekstutvalg for konfirmasjonsgudsteneste.

Ein kan også velja tekstar frå Tekstar i kyrkjeåret (Kirkeårets tekster), og ein kan velja andre høvelege tekstar som har vore sentrale i konfirmasjonstida.

#### Tekstar til konfirmasjonsgudstenesta:

GT: Salme 71, 1-6

Epistel. 1. Joh 4, 7-12

Evangelium: Lukas 2,41-52

GT: Salme 23

Epistel: Gal. 5, 13-14

Evangelium: Luk 24, 13-16. 28-35

GT: Salme 8  
Epistel: 1. Kor. 13, 7-13  
Evangelium: Joh 11, 17-29

GT: Jer. 29, 11-14a  
Epistel: Ef. 3, 14-21  
Evangelium: Matt. 6, 25-31. 33

GT: Salme 25, 4-5  
Epistel: 1. Kor. 12, 12 - 22  
Evangelium: Joh. 14, 1-7

GT: Salme 139, 1-6  
Epistel: Ef. 2, 8-10  
Evangelium: Luk 15, 1 – 10, *eller* Luk 15,11-24

**L/ML** | Lat oss høyra Herrens ord.

### **9 | Første lesinga**

**Frå Det gamle testamentet**

**ML** | Det står skrive hos /i ...

**Lesinga sluttar med:**

**ML** | Slik lyder Herrens ord.

### **10 | Bibelsk salme / Salme**

Ein kan syngja ein bibelsk salme eller ein annan salme, det kan vera korsong eller vera stilt ei kort stund mellom lesingane.

### **11 | Andre lesinga**

**Frå Det nye testamentet utanom evangelia**

**ML** | Det står skrive i ...

### **\*12 | Evangelium**

#### *Halleluja*

Evangelielesinga blir innleidd med eit hallelujaomkvede eller eit salmevers med hallelujaomkvede.

Kyrkjelyden står under halleluja, lesing og respons.

Ein kan òg ha evangelieprosesjon. Den som ber boka kan bli følgd av lysberarar.

*Sjå hallelujaomkvede i N13: 977.1 – 7. Ein kan også nytta Lovprisning/Benedicamus i ledd 25 som hallelujaomkvede. Omtale av halleluja og tractus i finn ein i Gudstenesteboka under ledd 12 Evangelium.*

#### *Evangelielesing*

**L/ML** | Det står skrive i evangeliet etter ...

**Lesingen sluttar med:**

**L/ML** | Slik lyder det heilage evangeliet.

#### *Respons*

Hallelujaomkvede blir teke oppatt, eller det blir sunge ein kort salme eller eit anna svarledd ved kyrkjelyd eller kor.

### 13 | Preike

Predikanten preikar over evangelieteksten eller annan oppsett preiketekst.

Preika kan avsluttast med ei av desse lovprisingane:

L | Ære vere Faderen og Sonen og Den heilage ande,  
som var og er og vera skal éin sann Gud frå æve og til æve.

ELLER

L | Ære vere Faderen og Sonen og Den heilage ande: Vår skapar, frigjerar og livgjevar.

Etter preika kan det vera tid til stille, ein kort salme eller meditatív musikk.

### 14 | Salme

Syndsvedkjenning følgjer her, eller som ledd 5.

Dersom det ikkje er dåp følgjer

### 15 | Påminning om dåpen

Som hovudregel har ein påminninga ved døypefonten.

Liturgen eller ein medliturg heller vatn i døypefonten.

Ein kan også nytta andre symbolhandlingar i tråd med lokale tradisjonar.

L Kjære kyrkjelyd.

Frå 2002-liturgien

I dåpen frelste Gud oss ut av mørkrets makt og gav oss rett til å vera born av lyset.

Vi vart kalla til å følgja Kristus og leva i samfunn med han.

Lat oss difor vedkjennast forsakinga og trua som lydde ved vår dåp.

Eller 2: Utarbeidd på bakgrunn av ledd 1 Mottaking til dåp i den no gjeldande dåpsliturgien frå 2017.

I dåpen vart vi sameina med den krossfeste og oppstadne Jesus Kristus.

Lat oss saman vedkjennast forsakinga og trua som lydde ved vår dåp.

Eller 3: I dåpen vart vi fødde på ny av vatn og ande.

Vi vart døypte til eit liv i tru og tillit til Jesus Kristus.

Lat oss saman vedkjennast forsakinga og trua som lyder ved dåpen.

Eller 4: I dåpen vart vi teikna med det heilage krossteiknet og fødde på ny av vatn og ande.

Vi vart sameina med den krossfeste og oppstadne Jesus Kristus og tekne inn fellesskapet i kyrkja.

Lat oss saman vedkjennast forsakinga og trua som lydde ved vår dåp.

Kyrkjelyden reiser seg.

## 16 | Truvedkjenning Credo

Alle

Eg forsakar djevelen....

Den apostoliske truvedkjenninga

Kyrkjelyden set seg.

## 17 | Salme

I staden for salmen kan det vera vokal-eller instrumentalmusikk.

## 18 | Forbøn for kyrkja og verda

### 18 A. | Forbøn for konfirmantane

Her kan det vera aktuelle forbøner for konfirmantane og deira familiar og nære relasjonar, forbøner som i særskild grad gjeld konfirmantane dette året eller hendingar som er viktige i lokalmiljøet.

Kyrkjelydssvaret følgjer den lokale grunnordninga.

*L* Kjære kyrkjelyd

Lat oss takka og be for konfirmantane våre.

Alternativ til lokale utforma bøner

*L/ML* Kjære Gud, vi takkar deg for konfirmantane.

Du har i dåpen gjeve din lovnad om å vera med oss alle dagar.

Vi bed for konfirmantane,

for familiare deira, for slekt og vener

og for alle som står nær.

Gud, vi bed:

*M* Kyrkjelydssvar

*L/ML* Trufaste Gud, du møter oss i Ordet ditt, i bøn og i nattverd.

Styrk oss alle i tru, von og kjærleik

og gjev oss å nå det evige målet i ditt rike.

Gud, vi bed:

*M* Kyrkjelydssvar

*L/ML* Evt.: Vi bed for... (aktuelle bønneemne i lokalt, nasjonalt eller globalt perspektiv)

*L/M* Gud vi bed

*M* Kyrkjelydssvar

Her følgjer Fadervår. Dersom ein feirar nattverd, kjem Fadervår under Del III, Nattverd.

### 18 B. | Bønesalme

### 18 C. | Forbøn med velsigning for den einskilde konfirmanten

## Liturg/medliturg

vend mot kyrkjelyden

*L/LM* Kjære konfirmantar.

Til den kristne trua er de døypte. I den kristne trua er de opplærte. Kom no fram til Herrens altar, så vi kan be for kvar einskild av dykk i Jesu namn.

Konfirmantane går fram slik det er avtalt på førehand og kneler på altarringen.

Alternativt kan éin og éin konfirmant gå fram til døypefonten og bli teikna i handa med eit krossteikn av ein medliturg. Det kan også tennast eit lys for konfirmanten. Så går konfirmanten fram til forbøn ved alteret. Når éin konfirmant går ned frå alterring, går den neste fram.

Liturgen/medliturgen bed for kvar einskild med handspålegging.

Bønene blir avslutta med " Velsign og bevar *henne/han*, i Jesu Kristi namn".

Under desse orda teiknar liturgen eit krossteikn over konfirmanten.

Etter forbøna eller ved del IV Sending kan den enkelte ta imot ein kross, ei rose eller ei anna symbolsk gåve, i samsvar med lokal tradisjon.

1 Livsens Gud, vi bed for *NN*. Hjelp *henne/han* til å leva i tillit og tru på din kjærleik. Velsign og bevar *henne/han*, (✠) i Jesu Kristi namn.

2 Trufaste Gud, vi bed for *NN*. Hald *henne/han* fast i ei sann tru ved Din heilage ande. Velsign og bevar *henne/han*, (✠) i Jesu Kristi namn.

3 Gode Gud, vi bed for *NN*. Ver støtte og tilflukt for *henne/han* gjennom livet. Velsign og bevar *henne/han*, (✠) i Jesu Kristi namn.

4 Kjærleikens Gud, vi bed for *NN*. Styrk *henne/han* til eit liv i tru, håp og kjærleik. Velsign og bevar *henne/han*, (✠) i Jesu Kristi namn.

5 Gud, vår skapar, vi bed for *NN*. Gje *henne/han* styrke og kraft ved din heilage Ande og vis *henne/han* dine vegar. Velsign og bevar *henne/han*, (✠) i Jesu Kristi namn.

6 Evige Gud, vi bed for *NN*. Lat *henne/han* vandra i ditt lys og leva omgjeven av din kjærleik. Velsign og bevar *henne/han*, (✠) i Jesu Kristi namn.

7 Miskunnsame Gud, vi bed for *NN*. Styrk *henne/han* ved Den heilage ande og ver med *henne/han* alle dagar i livet. Velsign og bevar *henne/han*, (✠) i Jesu Kristi namn.

8 Gud som gjev håp, vi bed for *NN*. Vis *henne/han* det håpet *ho/han* har i deg. Velsign og bevar *henne/han*, (✠) i Jesu Kristi namn.

9 Livsens Gud, vi bed for *NN* Lat *henne/han* leva i ditt lys og nå det evige målet hos deg. Velsign og bevar *henne/han*, (✠) i Jesu Kristi namn.

10 Nådige Gud, vi bed for *NN*. Ver *hennar/hans* styrke og hjelp, no og alle dagar. Velsign og bevar *henne/han* (✠) i Jesu Kristi namn.

11 Trufaste Gud, vi bed for *NN*. Ver nær *henne/han* med din nåde og di kraft. Velsign og bevar *henne/han*, (✠) i Jesu Kristi namn.

Etter at det er bede for alle konfirmantane, seier liturgen:

**Anten A**

*L* Lova vere Gud, vår Herre Jesu Kristi Far, han som i si store miskunn har fødd oss på nytt til ei levande von ved Jesu Kristi oppstode frå dei døde! Fred vere med dykk!

**Eller B**

*L* Gud er kjærleik, og den som blir verande i kjærleiken, blir i Gud og Gud i han. Må han som tok til med den gode gjerninga i dykk, fullføra henne, heilt til Jesu Kristi dag. Fred vere med dykk!

## 19. | Takkoffer frå kyrkjelyden, eventuelt med kunngjeringar og helsing

Takkoffer kan ein samla inn her eller under førebuinga av måltidet, eventuelt under postludiet. Under takkofferet kan det framførast høveleg instrumental- eller vokalmusikk. Takkofferet kan samlast inn i kyrkjebenkene, ved at ein går rundt altaret eller under ledd 27.

Her kan følgja ei kort helsing på vegner av kyrkjelyden.

Helsinga kan koma frå kateketen, kyrkjelydsspedagogen eller andre som har hatt spesielt ansvar for konfirmantane. (Sjå allmenne føresegner pkt 7)

**Alternativ for helsing**

*L* Kjære kyrkjelyd.

Saman har vi bede for konfirmantane. Lat oss saman hjelpa dei så dei kan leva i den kristne forsakinga og trua, og modnast til teneste for Gud og vår neste. Lat oss oppmuntra kvarandre til å bruka Guds ord og Herrens nattverd og gå den vegen som fører til livet.

De konfirmantar vil framleis ha kyrkjelydens forbøn om dykk. Gud er trufast og hans kjærleik utan grenser. Også i tider med likeglade tankar, nederlag og tvil vil Gud vera dykk nær og kalla dykk til samfunn med seg. Hald dykk nær til han. Då vil han, som tok til ei god gjerning i dykk, fullføra henne – heilt til Jesu Kristi dag.

**Eller**

**B** Kristus har kalla oss til å leva i trua på hans oppstode og vera hans vitne i verda. Ver i hans kjærleik og i fellesskapet av alle som trur på han. Lat oss alltid be for kvarandre, og saman med Kristus gå framtida i møte.

**Eller**

**C** Gud kallar oss til eit liv i tru, håp og kjærleik. Lat oss saman svara på kallet i bøn, tilbeding og teneste. Må Gud styrkja oss med sin nåde til det evige livet.

## III. Nattverd (ledda 20-23)



Dersom det er nattverd, har den sin plass her.

#### **IV. Sending**

Her kan følgja ei symbolhandling dersom denne ikkje vart lagd til forbønshandlinga, ledd 18 C.

##### **24. | Sluttsalme**

##### **25. | Velsigning**

##### **26. | Utsending**

##### **27. | Postludium/Utgangsprosesjon**

Konfirmantane går ut av kyrkja i prosesjon, følgde av medliturgar og liturg. Der det er krossberar går denne først i prosesjonen.